

# Illoqarfinni Upernavimmi, Aasianni Avannaatalu Kommuniata nunaqarfini arlalinni 31. julimit 10. augustip tungaanut killilersuigallarnerit pillugit Namminersorlutik Oqartussat nalunaarutaat

Nappaatit tunillaassortut akiorniarlugit iliuutsit pillugit Inatsisartut peqqussutaanni nr. 20, 12. november 2001-imeersumi, Inatsisartut inatsisaatigut nr. 1, 1. april 2020-meersutigut allanngortinneqartumi §§ 6, 6 a aamma 12 a, 12 b kiisalu § 29, imm. 2 aamma 3 naapertorlugit uku aalajangersarneqarput:

## Atuuffia

§ 1. Nalunaarut una illoqarfinni Upernavimmi aamma Aasianni kiisalu Avannaata Kommuniani nunaqarfinni ataani taaneqartuni atuutissaaq:

- 1) Tasiusaq.
- 2) Upernavik Kujalleq.
- 3) Nutaarmiut.
- 4) Nuussuaq.
- 5) Innaarsuit.
- 6) Naajaat.
- 7) Aappilattoq.
- 8) Kangersuatsiaq.
- 9) Kullorsuaq.

*Imm. 2.* Nalunaarut sumi atuuffissaa pillugu imm. 1-imi aalajangersakkat Naalakkersuisut aalajangiineratigut ilaneqarsinnaapput. Taamatut aalajangiinerit Naalakkersuisut qarasaasiakkut nalunaaruteqarfianni saqqummiunneqaraangata inatsisitigut sunniuteqalissapput.

*Imm. 3.* Nalunaarut Kalaallit Nunaanni Peqqinnissaqarfimmut imaluunniit nakorsiartarfinnut kiisalu nakorsiartarfinnut namminersortunut niuertarfinnilu peqqissaannermik naalagaaffimmit akuerisaallutik ingerlatani ingerlatsisunut atorfeqartitsiffiusunullu atuutinngilaq.

*Imm. 4.* Nalunaarut katersuunnernut, politikikkut allatulluunniit isummersornissamik sunniiniarnissamik siunertalinnut atuutinngilaq.

*Imm. 5.* Nalunaarut eqqartuussivinnut atuutinngilaq.

*Imm. 6.* Nalunaarut ulluunerani neqeroorutitut namminersortunut pisortaniillu pigineqartunut, atuarfinnut, ilinniarfeqarfinnut il.il. atuutinngilaq, nappaatit tunillaassortut akiorniarlugit iliuutsit pillugit Inatsisartut peqqussutaanni § 22 takuuk.

*Imm. 7. Nalunaarut angerlarsimaffinni aaqqissuussanut il.il. assigisaannut atuutinngilaq.*

*Imm. 8. Nunatsinni Nakorsaaneqarfik nalunaarummit immikkut akuersissuteqarsinnaavoq.*

*Illup iluani aaqqissuussani il.il. peqataasinnaasut amerlassusaannik killilersuinerit*

**§ 2.** Illup iluani aaqqissuussinerit, nalliuttorsiornerit, sammisaqartitsinerit assigisaalluunniit, inunnik 20-nik sinnerlugit peqataasussallit inerteqqutaapput.

*Imm. 2. Imm. 1-ip maleruarneqarnissaata qulakkeernissaa aaqqissuussisup il.il. akisussaaffigaa.*

*Aaqqissuussani il.il. silami ingerlanneqartussani peqataasinnaasut amerlassusaannik killilersuinerit*

**§ 3.** Silami aaqqissuussat, nalliuttorsiornerit, sammisaqartitsinerit assigisaalluunniit, inunnik 20-t sinnerlugit peqataasussallit inerteqqutaapput.

*Imm. 2. Imm. 1-ip maleruarneqarnissaata qulakkeernissaa aaqqissuussisup il.il. akisussaaffigaa.*

*Ininut kikkunnilluunniit iserfigineqarsinnaasunut piumasaqaatit*

**§ 4.** Inuussutissarsiummik ingerlatallit aamma suliffeqarfiit pisortanit pigineqartut ininik kikkunnit tamanit iserfigineqarsinnaasunik pigisallit piumasaqaatinik makkuninnga naammassinnissimassapput:

1) Inuit inimi sulisussat saniatigut, inuit amerlanerpaamik 20-t isersimaqqusaapput. Piumasaqaat ulluinnarni niuertarfinnut atuutinngilaq.

2) Inuit ininut qatserisartoqarfinni oqartussaasunit akuerineqarsimasunut isersinnaatitaasut amerlanerpaaffissaasa affaannaat isersimaqqusaapput, taamaattorli § 2 takuuk.

2) Inini qatserisartoqarfinni oqartussaasunit akuersissutitaqartinneqanngitsuni, natermi 4 m<sup>2</sup>-iusumi amerlanerpaamik inuk ataasiinnaaqqusaavoq. Nateq 4 m<sup>2</sup>-imik mikineruppat oqaaseqatigiit siulliit apeqqutaatinnagit inuup ataatsip isersimanissaa akuerineqarpoq. Nateq qanoq pequteqartiginera apeqqutaatinnagu iikkamiit iikkamut naatsorsorneqassaaq.

*Imm. 2. Imm. 1-ip maleruarneqarnissaata qulakkeernissaa inimik pigisallip akisussaaffigaa.*

*Tamanut angallassissutini amerlassutsinik killilersuinerit*

**§ 5.** Tamanut angallassissutit issiaffiusinnaasut sinnerlugit ilaasoqaqqusaanngillat.

*Imm. 2. Imm. 1-ip maleruarneqarnissaata qulakkeernissaa angallassissummik piginnittup akisussaaffigaa.*

*Tamanut angallassissutini ilaanermut piumasaqaatit*

**§ 6.** Inunnut imm. 2-mi angallassissutininik atuisunut piumasaqaataavoq:

1) Covid-19-imut tamakkiisumik akiuussuserneqarsimanissaaq, taamaattorli imm. 3 takuuk, imaluunniit

2) annerpaamik akunnernik 48-nik pisoqaassusilik COVID-19-imik tunillatsissimannginnermut uppersaammik takutitsineq

*Imm. 2. Tamanut angallassissutit tamarmik imm. 1-mi ilaapput, tassunga ilanngullugit assersuutigalugu:*

1) Silaannakkut angallassissutit nunaqarfinnit § 1, imm. 1-mi taaneqartunit aallartut.

2) Bussit.

3) Umiarsuit inunnik angallassisartut, aalajangersimasumillu angalasartut.

*Imm. 3. Inuit tullinnguuttut imm. 1-imi piumasaqaammit ilaatinneqanngillat:*

1) Inuit najukkaminnut tikinniarlutik umiarsuarmik imaluunniit silaannakkut angallassissutimik angalasut.

2) Inuit Covid-19-imut akiuussuserneqarnissaminut peqqissaavimmut umiarsuarmik imaluunniit silaannakkut angallassissutimik angalasut.

3) Inuit katsorsartinnerminnut atatillugu peqqissaavimmut umiarsuarmik imaluunniit silaannakkut angallassissutimik angalasut.

4) Inuit inuiaqatigiinni suliaaqaqtitaasut tamanullu angallassissutinik angalasariaqalersut.

5) Inuit Covid-19-imut akiuussutissamik kapitinnissamut Nunatta Nakorsaaneqarfianit nalinginnaasumik innersuunneqanngitsut.

6) Inuit 17-inik ukiullit ukiukinnerusulluunniit.

7) Sulisut tamanut angallassissummi pineqartumi sulisut.

**§ 7.** Inuk Covid-19-imut tamakkiisumik akiuussuserneqarsimasutut isigineqassaaq inuup akiuussuserneqarsimanerup ingerlarngata naammassisimaneranik uppersaasinnaappat.

#### *Qanermut imaluunniit kiinnamut assiaquteqarnissamut piumasaqaat*

**§ 8.** Inuit aqqaneq-marlunnik sinnerlugillu ukiullit qanermut imaluunniit kiinnamut assiaquteqassapput:

1) inini kikkunnit tamanit iserfigineqarsinnaasuni isersimagunik, taamaattorli imm. 2-4 takukkit.

2) tamanut angallassissutini taxanilu ilaagunik, taamaattorli imm. 2-4 takukkit.

*Imm. 2. Qanermut imaluunniit kiinnamut assiaquteqarnissamut piumasaqaat ilisimassutsimik annikillimasunut, timikkut tarnikkulluunniit sanngiitsunut, allamilluunniit peqquteqarlutik qanermut kiinnamulluunniit assiaquteqarsinnaanngitsunut atuutinngilaq.*

*Imm. 3. Imm. 1-imi allassimasut apeqqutaatinnagit qanermut kiinnamulluunniit assiaqutit tamakkiisumik ilaannakortumilluunniit peeqqaneqarallarsinnaapput, tamanna peqqutissaqarluarpat, tassunga ilanngullugu ima pisoqarnerani:*

1) Piffissami sivikitsumi nerinnermi imernermilu.

2) Nakorsaattornermi.

3) Qarngit aalaneratigut atuaasartumik oqaloqateqarnermi.

4) Qanermut kiinnamulluunniit assiaqutit anersaartorniarnermut ajoqutaappata ipianngulersitsippataluunniit.

5) Politiit kinaassutsimik uppersaaneranni.

*Imm. 4. Niuernermik kiffartuussinermillu ingerlatsiviit qanermut kiinnamulluunniit assiaqutinik atuinatik sulisut sullitallu akornanni plastikkisumik igalaaminermiusumilluunniit assiaqusersinnaapput.*

**§ 9.** Qanermut assiaqutit taaneqartut tassaapput qanermut qinngamullu assiaqutit ataasiartakkat imaluunniit annoraaminermi sanaat allunaasamillu tasisartumilluunniit siutitut ikkuttartut imaluunniit niaqqup tunuatungaani qilertartoq kiinnamullu attuumasoq.

*Imm. 2. Kiinnamut assiaqutit tassaapput isinut, qanermut qinngamullu assiaqutit plastikimik sanaat kiinnamut attuumanngitsut.*

*Inuit pillugit paasisutissanik suliarinninnerit*

**§ 10.** Nalunaarut una naapertorlugu inuup akiuussuserneqarsimaneranut inissisimaffia uppersarniarlugu inuit pillugit paasisutissanik suliarinnittoqarsinnaavoq.

*Iliuseqarnerit*

**§ 11.** §§ 2-8-nik unioqqutitsisoq pinerluttulerinermik inatsit malillugu pineqaatissinneqarsinnaavoq.  
*Imm. 2.* Ingerlatseqatigiiffiit il.il. (inatsisilerinermi inuttut immikkoortutut isigineqartut) pinerluttulerinermik inatsimmi kapitali 5-imi malittarisassat malillugit pinerluttuleringeq pillugu inatsiseqartitsinikkut akisussaatinneqarlutik pineqaatissinneqarsinnaapput.

*Atuutilersitsineq, atorunnaarsitsineq piffissarlu atuuffissaq*

**§ 12.** Nalunaarut una ullormi 31. juli 2021-mi atuutilissaaq.

*Imm. 2.* Peqatigisaanik atorunnaarsinneqarpoq:

- 1) Avannaata kommuniani Upernavimmi il.il. angallassissutinik tamanit ilaaffigineqarsinnaasunik killilersuigallarnerit pillugit Namminersorlutik Oqartussat nalunaarutaat nr. 32, 28. juli 2021-meersoq.
- 2) Kalaallit Nunaat tamakkerlugu 20. juli 2021-miit 30. juli 2021 tikillugu killilersuigallarnerit pillugit Namminersorlutik Oqartussat nalunaarutaat nr. 30, 19. juli 2021-meersoq.

*Imm. 3.* Nalunaarut malillugu killilersuinerit, inerteqquteqarnerit, peqqusinerit il.il. 10. august 2021 ilanngullugu atuutissapput.

*Namminersorlutik Oqartussat, ulloq 30. juli 2021.*

Kirsten Fencker  
Peqqinnissamut Naalakkersuisoq

/ Aka Olesen

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut